

Na osnovu člana 16. stav 4. Zakona o Vladi Zeničko - dobojskog kantona Prečišćeni tekst („Službene novine Zeničko - dobojskog kantona, broj: 7/10), na prijedlog Ministarstva za prostorno uređenje, promet i komunikacije i zaštitu okoline, Vlada Zeničko-dobojskog kantona, na 86. sjednici, održanoj 20.06.2025. godine, d o n o s i

ZAKLJUČAK

I.

Utvrđuje se Prijedlog Odluke o osnivanju Javnog preduzeća "Televizija Zeničko-dobojskog kantona" d.o.o. Zenica.

II.

Zaključak sa Prijedlogom Odluke iz tačke I. ovog zaključka upućuje se u daljnju skupštinsku proceduru.

III.

Zaključak stupa na snagu danom donošenja.

Broj: 02-_____/25
Datum, 20.06.2025. godine
Zenica

PREMIJER

Nezir Pivić

DOSTAVLJENO:

1x Ministarstvo za prostorno uređenje,
promet i komunikacije i zaštitu okoline,
1x Stručna služba Skupštine,
1x a/a.

Na osnovu člana 18. stav (1) tačka j) i člana 37. stav (1) tačka f) Ustava Zeničko-dobojskog kantona i člana 304. stav (2) Zakona o privrednim društvima ("Službene novine Federacije BiH", br. 81/15 i 75/21) Skupština Zeničko-dobojskog kantona, na ____ sjednici, održanoj ____ 2025. godine, donosi:

O D L U K U
O OSNIVANJU JAVNOG PREDUZEĆA
TELEVIZIJA ZENIČKO-DOBOJSKOG KANTONA

DIO PRVI – OSNOVNE ODREDBE

Član 1.
(Predmet)

Ovom odlukom Skupština Zeničko-dobojskog kantona, ul. Kučukovići 2, Zenica, (u daljnjem tekstu: Osnivač) osniva Javno preduzeće "Televizija Zeničko-dobojskog kantona" d.o.o. Zenica (u daljnjem tekstu: Preduzeće), od javnog interesa za Zeničko-dobojski kanton (u daljnjem tekstu: Kanton), te se uređuje: naziv i sjedište Preduzeća, djelatnost Preduzeća, iznos osnovnog kapitala, prava i odgovornosti u pravnom prometu, organi Preduzeća, unutrašnja organizacija, prava i obaveze osnivača i radnika, programski savjet, planiranje poslovanja i razvoja i poslovne knjige, utvrđivanje i raspoređivanje dobiti i pokriće gubitka, opći akti Preduzeća, trajanje i prestanak Preduzeća, način izmirenja troškova osnivanja Preduzeća i posljedice neuspjelog osnivanja i prelazne i završne odredbe.

Član 2.
(Organizacioni oblik Preduzeća)

Preduzeće, u skladu sa Zakonom o javnim preduzećima u Federaciji Bosne i Hercegovine ("Službene novine Federacije BiH", br. 8/05, 81/08, 22/09 i 109/12) i Zakonom o privrednim društvima ("Službene novine Federacije BiH", broj: 81/15 i 75/21) djeluje kao društvo sa ograničenom odgovornošću.

Član 3.
(Imovina i sredstva Preduzeća)

Imovina i sredstva Preduzeća su vlasništvo Preduzeća.

DIO DRUGI – NAZIV I SJEDIŠTE PREDUZEĆA

Član 4.
(Naziv Preduzeća)

- (1) Preduzeće posluje pod nazivom: Javno preduzeće „Televizija Zeničko-dobojskog kantona“ društvo sa ograničenom odgovornošću Zenica.
- (2) Skraćeni naziv: JP „TV ZDK“ d.o.o. Zenica.

Član 5.
(Sjedište Preduzeća)

Sjedište Preduzeća je u Zenici, na adresi: Ulica Mehmedalije Tarabara br 15.

Član 6.
(Pečat Preduzeća)

- (1) Preduzeće ima pečat okruglog oblika u kojem je ispisan puni naziv preduzeća i štambilj četvrtastog oblika, koji sadrži puni naziv preduzeća.
- (2) Broj pečata i štambilja, upotreba, rukovanje, način čuvanja i uništenja pečata i štambilja utvrdit će se općim aktom koji donosi Uprava Preduzeća.

DIO TREĆI – DJELATNOST PREDUZEĆA

Član 7.
(Djelatnost Preduzeća)

Preduzeće obavlja djelatnost, i to:

- a) 18.20 Umnožavanje snimljenih zapisa
- b) 47.91 Trgovina na malo preko pošte ili interneta
- c) 59.11 Proizvodnja filmova, videofilmova i televizijskog programa
- d) 59.12 Djelatnosti koje slijede nakon proizvodnje filmova, videofilmova i televizijskog programa
- e) 59.20 Djelatnost snimanja zvučnih zapisa i izdavanja glazbenih zapisa
- f) 60.10 Emitiranje radijskog programa
- g) 60.20 Emitiranje televizijskog programa
- h) 61.10 Djelatnost žičane telekomunikacije
- i) 61.20 Djelatnost bežične komunikacije
- j) 61.30 Djelatnost satelitske komunikacije
- k) 61.90 Ostale telekomunikacijske djelatnosti
- l) 73.11 Agencije za promidžbu (reklamu i propagandu)
- m) 73.12 Oglašavanje preko medija
- n) 73.20 Istraživanje tržišta i ispitivanje javnog mnijenja
- o) 77.39 Iznajmljivanje i davanje u zakup (leasing) ostalih strojeva, opreme i materijalnih dobara, d.n.
- p) 82.30 Organizacija sastanaka i poslovnih sajmova.

Član 8.
(Vanjskotrgovinsko poslovanje)

Djelatnost Preduzeća u vanjskotrgovinskom poslovanju glasi:

- a) vanjskotrgovinski promet u okviru registrovane djelatnosti,
- b) usluge u vanjskotrgovinskom prometu u okviru registrovane djelatnosti,
- c) zastupanje stranih lica u okviru registrovane djelatnosti,
- d) posredovanje i zastupanje u prometu roba i usluga.

Član 9.
(Obavljanje drugih djelatnosti)

- (1) Preduzeće može obavljati poslove samo u okviru djelatnosti upisane u sudski registar.
- (2) Preduzeće može obavljati i druge poslove koji se uobičajeno obavljaju uz djelatnosti upisane u sudski registar, u obimu i na način koji su potrebni za poslovanje, a ne predstavljaju obavljanje tih poslova kao redovne djelatnosti.

Član 10.
(Ugovori o poslovno-tehničkoj saradnji)

U svrhu produkcije i emitovanja televizijskog programa Preduzeće može sklapati ugovore o poslovno-tehničkoj saradnji sa drugim društvima čija je djelatnost emitovanje ili proizvodnja televizijskog i programa.

Član 11.
(Program Preduzeća)

Program Preduzeća uređivat će se i proizvoditi u skladu sa zakonom i propisima Regulatorne agencije za komunikacije Bosne i Hercegovine, uz poštovanje profesionalnih standarda, novinarske etike i drugih uobičajenih pravila i kriterija profesije.

Član 12.
(Emitovanje programskog sadržaja)

- (1) Druga pravna i fizička lica ne mogu, bez saglasnosti Preduzeća, emitovati programske sadržaje Preduzeća, niti vršiti njihovo snimanje u svrhu umnožavanja i daljne prodaje.
- (2) Lica iz stava (1) ovog člana mogu, u skladu sa zakonom, emitovati samo kratke izvode iz kulturnih, sportskih i drugih događaja, od interesa za javnost, koje Preduzeće direktno prenosi.

DIO ČETVRTI - OSNOVNI KAPITAL PREDUZEĆA

Član 13.
(Iznos osnovnog kapitala Preduzeća)

- (1) Osnovni kapital Preduzeća čini novac iskazan u iznosu od 10.000,00 KM (slovima: desethiljada i 00/100 KM), koji će se osigurati iz Budžeta Kantona.
- (2) Osnovni kapital Preduzeća čini udio Osnivača u iznosu od 10.000,00 KM (slovima: desethiljada i 00/100 KM) ili 100 %.
- (3) Osnivač je dužan osnivački ulog u iznosu navedenom u stavu (2) uplatiti na privremeni račun kod Banke do dana podnošenja prijave za upis osnivanja Preduzeća u sudski registar.
- (4) Iznos osnivačkog uloga iz stava (3) ovog člana Preduzeće će kao osnovni kapital prenijeti na transakcijski račun Preduzeća i s njim raspolagati isključivo u skladu sa Zakonom.
- (5) Osnovni iznos kapitala se ne može smanjivati ispod zakonskog minimuma od 1.000,00 KM KM (slovima: jednahiljada i 00/100 KM).

Član 14.
(Povećanje i smanjenje kapitala)

Povećanje i smanjenje osnovnog kapitala vrši se u skladu sa odredbama Zakona o privrednim društvima i drugim relevantnim važećim propisima.

Član 15.
(Finansiranje Preduzeća)

Djelatnost Preduzeća se finansira iz sredstava koja se obezbjeđuju obavljanjem djelatnosti, sredstava donatora i sponzora, te i iz sredstava Budžeta Kantona.

Član 16.
(Sredstva Preduzeća)

Sredstva Preduzeća u toku poslovanja čine stvari, prava i novac.

DIO PETI - PRAVA, OBAVEZE I ODGOVORNOSTI U PRAVNOM PROMETU

Član 17.
(Prava, obaveze i odgovornosti Preduzeća)

Sredstva Preduzeća su u pravnom prometu.

Preduzeće u pravnom prometu zaključuje ugovore i sporazume i vrši druge pravne poslove i radnje.

Član 18.
(Odgovornost Preduzeća za svoje obaveze)

- (1) Preduzeće svojstvo pravnog lica stiče danom upisa u sudski registar.
- (2) Preduzeće odgovara za svoje obaveze cjelokupnom svojom imovinom.
- (3) Osnivač odgovara za obaveze Preduzeća do visine osnivačkog uloga.

DIO ŠESTI - ORGANI PREDUZEĆA

Član 19.
(Organi Preduzeća)

Organi Preduzeća su:

- a) Skupština,
- b) Nadzorni odbor,
- c) Uprava, kao organ upravljanja i,
- d) Odbor za reviziju.

POGLAVLJE I. SKUPŠTINA PREDUZEĆA

Član 20.
(Skupština Preduzeća)

- (1) U ime Osnivača, prava i obaveze vrši Skupština Preduzeća.
- (2) Skupštinu Preduzeća čine predsjednik i dva člana koje imenuje Vlada Kantona na period od četiri godine, sa mogućnošću ponovnog imenovanja.
- (3) Odluku o imenovanju predsjednika i članova Skupštine Preduzeća donosi Vlada Kantona u ime Osnivača, a provođenje postupka izbora predsjednika i članova Skupštine Preduzeća, shodno odredbama zakona kojim se uređuju ministarska, vladina i druga imenovanja, provodi Ministarstvo za prostorno uređenje, promet i komunikacije i zaštitu okoline Kantona (u daljnjem tekstu: Ministarstvo)
- (4) Posebni uvjeti za imenovanje člana Skupštine Preduzeća propisani su odlukom Vlade Kantona kojom se utvrđuju standardi i kriteriji za imenovanja/nominiranja na upražnjene pozicije u reguliranim tijelima Kantona.
- (5) Skupština poslove iz svoje nadležnosti vrši na sjednicama, koje se održavaju u sjedištu Preduzeća.
- (6) Rad Skupštine reguliše se Poslovníkom o radu koji je Skupština Preduzeća dužna usvojiti u roku od 15 dana od dana imenovanja.
- (7) Naknada za rad u Skupštini Preduzeća utvrđuje se aktom Vlade Kantona.

Član 21.
(Nadležnosti Skupštine Preduzeća)

- (1) Skupština Preduzeća je nadležna da odlučuje o:
 - a) donošenju Statuta Preduzeća, kao i o njegovim izmjenama i dopunama;
 - b) raspodjeli godišnje dobiti i pokriću gubitka;
 - c) povećanju i smanjenju osnovnog kapitala;
 - d) osnivanju novih društava;
 - e) planu poslovanja, investiranju i trajnoj poslovnoj saradnji, odnosno povezivanju sa drugim društvima;
 - f) donosi Etički kodeks i Poslovnik Skupštine;
 - g) imenovanju i razrješenju Nadzornog odbora i Odbora za reviziju;
 - h) naknadama članova Nadzornog odbora i Odbora za reviziju;
 - i) usvajanju godišnjeg izvještaja o poslovanju Preduzeća koji uključuje finansijski izvještaj i izvještaj revizora, Nadzornog odbora i Odbora za reviziju;
 - j) rasporedu dobiti;
 - k) načinu pokrića gubitka;

- l) kupovini, prodaji, zamjeni ili davanju u lizing, uzimanju ili davanju kredita i drugim transakcijama imovinom, direktno ili posredstvom supsidijarnih društava u toku poslovnog godine u obimu većem od 33% knjigovodstvene vrijednosti imovine Preduzeća po bilansu stanja na kraju prethodne godine, na prijedlog Uprave i Nadzornog odbora;
 - m) promjeni oblika i podjeli Preduzeća;
 - n) ostalim pitanjima u skladu sa Zakonom o privrednim društvima, Zakonom o javnim preduzećima i Statutom Preduzeća.
- (2) Kod donošenja Statuta Preduzeća i njegove izmjene i dopune, odluke o povećanju i smanjenju osnovnog kapitala, odluke o pokriću gubitaka, statusne promjene Preduzeća, Skupština preduzeća je obavezna pribaviti saglasnost Vlade Kantona.

Član 22. **(Izveštaj o radu)**

Skupština Preduzeća podnosi Osnivaču najmanje jednom godišnje Izveštaj o radu i poslovanju Preduzeća koji uključuje finansijski izvještaj i izvještaj revizora, Nadzornog odbora i Odbora za reviziju.

Član 23. **(Razrješenje članova Skupštine)**

Vlada Kantona može razriješiti predsjednika i članove Skupštine Preduzeća i prije roka na koji su imenovani kad:

- a) Predsjednik ili član Skupštine Preduzeća izgubi povjerenje Vlade Kantona.
- b) Vlada Kantona odbije usvojiti godišnji izvještaj Preduzeća koji uključuje finansijski izvještaj i izvještaj revizora, Nadzornog odbora i Odbora za reviziju, i
- c) Predsjednik ili član Skupštine Preduzeća podnese ostavku na dužnost u Skupštini Preduzeća.

POGLAVLJE II. NADZORNI ODBOR

Član 24. **(Nadzorni odbor)**

- (1) Preduzeće ima Nadzorni odbor koji se sastoji od predsjednika i dva člana, koje imenuje i razrješava Skupština Preduzeća, u skladu sa prijedlogom kojeg utvrdi Vlada Kantona.
- (2) Predsjednik i članovi Nadzornog odbora imenuju se istovremeno na period od četiri godine, s tim da po isteku perioda od dvije godine od dana imenovanja Skupština Preduzeća glasa o povjerenju predsjedniku i članovima Nadzornog odbora.
- (3) Ministarstvo provodi postupak izbora kandidata za predsjednika i člana Nadzornog odbora, shodno odredbama zakona kojim se uređuju ministarska, vladina i druga imenovanja.
- (4) Za predsjednika i članove Nadzornog odbora ne može biti imenovano lice iz člana 248. Zakona o privrednim društvima.
- (5) Rad Nadzornog odbora će se detaljnije regulisati Poslovnikom o radu Nadzornog odbora, u skladu sa Zakonom o privrednim društvima i Zakonom o javnim preduzećima.
- (6) Naknada i druga prava članova Nadzornog odbora određuju se aktom Skupštine Preduzeća, uz saglasnost Vlade Kantona.

Član 25. **(Nadležnosti Nadzornog odbora)**

Nadzorni odbor nadležan je da:

- a) na konstituirajućoj sjednici izabere predsjednika i zamjenika predsjednika Nadzornog odbora,
- b) nadzire poslovanje Preduzeća, usvaja poslovne strategije Preduzeća i planove poslovanja,
- c) imenuje i razrješava upravu Preduzeća, uz saglasnost Vlade Kantona,
- d) odobrava odluke strateškog karaktera;

- e) usvaja izvještaj Uprave o poslovanju po polugodišnjem i godišnjem obračunu sa bilansom stanja i bilansom uspjeha i izvještajem revizije;
- f) podnosi Skupštini godišnji izvještaj o poslovanju Preduzeća koje obavezno uključuje finansijski izvještaj i izvještaj revizora, Nadzornog odbora i Odbora za reviziju;
- g) odobrava kupovinu, prodaju, zamjenu, uzimanje ili davanje u lizing, uzimanje ili davanje kredita i druge transakcije imovinom, direktno ili posredstvom supsidijarnih društava u toku poslovne godine u obimu od 15% do 33% knjigovodstvene vrijednosti ukupne imovine Preduzeća po bilansu stanja na kraju prethodne godine,
- h) predlaže Skupštini Preduzeća kupovinu, prodaju, zamjenu, uzimanje ili davanje u lizing, uzimanje ili davanje kredita i druge transakcije imovinom, direktno ili posredstvom supsidijarnih društava u toku poslovne godine u obimu većem od 33% knjigovodstvene vrijednosti ukupne imovine Preduzeća po bilansu stanja na kraju prethodne godine,
- r) daje mišljenje Skupštini o prijedlogu uprave za raspodjelu dobiti;
- s) predlaže način pokrića gubitka;
- t) priprema i predlaže poslovničke, etičke kodekse i druge akte koje usvaja Skupština Preduzeća;
- u) vrši izbor kandidata Odbora za reviziju i podnosi prijedlog za imenovanje Skupštini Preduzeća nakon provedenog javnog konkursa,
- v) razmatra i nadzire postupak javnih nabavki;
- z) odlučuje po prigovorima radnika iz radnog odnosa kao drugostepeni organ;
- aa) daje upute direktoru za provođenje preporuka, mjera i aktivnosti u vezi sa uočenim nepravilnostima;
- bb) za ostala pitanja u skladu sa Zakonom o privrednim društvima, Zakonom o javnim preduzećima i Statutom Preduzeća.

Član 26. **(Razrješenje članova Nadzornog odbora)**

Skupština Preduzeća može, uz saglasnost Vlade Kantona, razriješiti predsjednika i članove Nadzornog odbora i prije roka na koji su imenovani kad:

- a) Nadzorni odbor ili njegov član izgubi povjerenje Skupštine Preduzeća;
- b) Skupština Preduzeća odbije usvojiti godišnji izvještaj Preduzeća koji uključuje finansijski izvještaj i izvještaje revizora, Nadzornog odbora i Odbora za reviziju,
- c) kad u toku mandata predsjednika ili člana Nadzornog odbora nastupe okolnosti iz člana 248. Zakona o privrednim društvima, i
- d) Predsjednik ili član Nadzornog odbora podnese ostavku na dužnost u Nadzornom odboru.

POGLAVLJE III. UPRAVA PREDUZEĆA

Član 27. **(Uprava)**

- (1) Uprava organizira rad i rukovodi poslovanjem, zastupa i predstavlja Preduzeće i odgovara za zakonitost poslovanja.
- (2) Funkciju uprave vrši direktor Preduzeća.
- (3) Uprava se bira, imenuje i razrješava u skladu sa postupkom utvrđenim u Statutu, a na osnovu javnog konkursa iz reda kandidata koji po menadžerskim znanjima i iskustvu najbolje odgovaraju za izvršenje operativnih i poslovnih potreba javnog preduzeća. U upravi ne može biti imenovano lice koje vrši funkciju u političkim strankama.
- (4) Direktor Preduzeća podliježe dužnostima, odgovornostima i ograničenjima utvrđenim važećim propisima.
- (5) Mandat direktora je četiri godine.

Član 28. **(Nadležnosti Uprave)**

Uprava je nadležna za:

- a) izvještavanje Nadzornog odbora na zahtjev Nadzornog odbora;
- b) provedbu Etičkog kodeksa;
- c) izradu i nadgledanje planova poslovanja;
- d) izradu provedbenih propisa za postupak nabavki i provedbu Zakona o javnim nabavkama;
- e) pripremu prijedloga o raspodjeli dobiti;
- f) zapošljavanje i otpuštanje radnika u skladu sa postupcima utvrđenim u poslovniku ili poslovniciima te važećim zakonima;
- g) odlučivanje o pravima i obavezama radnika iz radnog odnosa;
- h) pripremu prijedloga cijena proizvoda i usluga;
- i) pripremu prijedloga općih akata i dostavljanje na usvajanje Nadzornom odboru,
- j) ostala pitanja u skladu sa Zakonom o privrednim društvima, Zakonom o javnim preduzećima i Statutom Preduzeća.

Član 29. (Ovlaštenje)

- (1) Direktor je ovlašten da u ime Preduzeća zaključuje ugovore i vrši druge pravne poslove i radnje, kao i da zastupa Preduzeće pred sudom i drugim organima.
- (2) Direktor poduzima sve radnje vezane za registraciju Preduzeća kod nadležnih organa.

Član 30. (Plaća)

Direktor ima pravo na plaću u skladu sa Statutom i općim aktima Preduzeća.

Član 31. (Zastupanje)

Direktor zastupa i predstavlja Preduzeće u unutrašnjem i vanjskotrgovinskom prometu u skladu sa Statutom Preduzeća.

POGLAVLJE IV. ODBOR ZA REVIZIJU

Član 32. (Odbor za reviziju)

- (1) U preduzeću se formira Odbor za reviziju.
- (2) Odbor za reviziju ima predsjednika i dva člana.
- (3) Postupak izbora, imenovanja, razrješenja, sastav i način odlučivanja Odbora za reviziju utvrđuje se Statutom Preduzeća.
- (4) Predsjednik i član Odbora za reviziju ne može biti član Nadzornog odbora i uprave, zaposlen niti imati direktni ili indirektni finansijski interes u Preduzeću izuzev naknade na osnovu funkcije.
- (5) Naknada i druga prava članova Odbor za reviziju određuju se odlukom Skupštine Preduzeća, uz saglasnost Vlade Kantona.
- (6) Odbor za reviziju je dužan izvršiti reviziju polugodišnjeg i godišnjeg obračuna i istovremeno kontrolu usklađenosti poslovanja Preduzeća i funkcioniranja organa Preduzeća sa Zakonom o privrednim društvima, Zakonom o javnim preduzećima, drugim relevantnim propisima i osnovnim principima korporativnog upravljanja i o tome dostaviti izvještaj Skupštini i Nadzornom odboru najkasnije osam dana po okončanju revizije.
- (7) Odbor za reviziju dužan je da:
 - a) imenuje vanjskog revizora i direktora odjela za internu reviziju u slučaju njene uspostave;
 - b) razmatra godišnju studiju rizika i plan revizije u skladu sa zakonima;
 - c) osigurava uslove Odjelu za internu reviziju da izvrši svoje obaveze u skladu sa planom revizije i međunarodnim revizorskim standardima;

- d) zahtijeva sazivanje sjednice Skupštine Preduzeća i Nadzornog odbora kada smatra da su ugroženi interesi vlasnika ili nepravilnosti u radu predsjednika ili članova Nadzornog odbora ili uprave;
- e) preduzima mjere da interna kontrola u Preduzeću bude adekvatna i efikasna;
- f) podnosi mjesečne izvještaje Nadzornom odboru Preduzeća o radu i preduzetim mjerama;
- g) vrši ostale poslove u skladu sa Zakonom o privrednim društvima, Zakonom o javnim preduzećima i Statutom Preduzeća.

DIO SEDMI - UNUTRAŠNJA ORGANIZACIJA PREDUZEĆA

Član 33. (Način poslovanja)

- (1) Preduzeće posluje kao jedinstveni pravni subjekt, čije će se poslovanje, organizacija, način vođenja poslovnih knjiga kao i ostala pitanja od značaja za organizaciju i rad Preduzeća detaljnije urediti Statutom Preduzeća, u skladu sa Zakonom.
- (2) Preduzeće može imati i svoje podružnice, čije će se osnivanje vršiti u skladu sa Zakonom.
- (3) Preduzeće planira svoje poslovanje i razvoj i odlučuje o vrsti i sadržini planova poslovanja i razvoja Preduzeća.
- (4) Preduzeće planiranje poslovanja i razvoja prilagođava ciljevima radi kojih je osnovano i uslovima djelovanja zakonitosti tržišta.
- (5) O radu i poslovanju Preduzeća vode se poslovne knjige u skladu sa Zakonom.
- (6) Preduzeće je dužno za svaku poslovnu godinu, u skladu sa važećim zakonskim propisima, sastaviti periodični obračun i završni račun.
- (7) Preduzeće donosi opće i druge akte u skladu sa Zakonom.
- (8) Preduzeće donosi trogodišnji plan poslovanja koji na godišnjem nivou razmatra i u slučaju potrebe isti revidira i usaglašava.

DIO OSMI - PROGRAMSKI SAVJET

Član 34. (Programski savjet)

- (1) Radi ostvarivanja i zaštite interesa javnosti u kreiranju i utvrđivanju programa, Preduzeće obrazuje programski savjet (u daljnjem tekstu: Savjet).
- (2) Savjet ima sedam članova, koje imenuje i razrješava Nadzorni odbor, uz saglasnost Regulatorne agencije za komunikacije Bosne i Hercegovine.
- (3) Članovi Savjeta treba da imaju iskustvo u oblasti medija, kulture, nauke i umjetnosti.
- (4) Mandat članova Savjeta traje dvije godine, uz mogućnost reizbora po isteku mandata.
- (5) Način i djelokrug rada kao i izbor članova Savjeta će se bliže odrediti Statutom Preduzeća.

DIO DEVETI - UTVRĐIVANJE I RASPOREĐIVANJE DOBITI I POKRIĆE GUBITKA

Član 35. (Način utvrđivanja i raspoređivanja dobiti)

- (1) Utvrđivanje prihoda, rashoda i rezultata poslovanja vrši se polugodišnjim i godišnjim obračunom u skladu sa zakonom.
- (2) Dobit koja ostaje Preduzeću predstavlja neto (čistu) dobit. Neto dobit je finansijski rezultat poslovanja Preduzeća u toku poslovne godine, koja se dobije poslije odbitka svih troškova poslovanja i svih davanja po osnovu doprinosa, poreza i drugih finansijskih tereta.
- (3) Odluku o raspodjeli dobiti/dividende donosi Skupština Preduzeća na obrazložen prijedlog Uprave, uz prethodno pribavljeno mišljenje Odbora za reviziju i Nadzornog odbora.
- (4) Preduzeće može formirati statutarne rezerve.
- (5) Statutarne rezerve se formiraju iz dobiti i drugih izvora u skladu sa važećim propisima, a može se koristiti za pokriće gubitka i drugih nepredviđenih troškova u poslovanju na osnovu odluke Skupštine Preduzeća.

Član 36.
(Gubitak poslovanja Preduzeća)

Ako Preduzeće u poslovanju po završnom računu iskaže gubitak, taj gubitak će se prvenstveno pokriti iz sredstava Preduzeća, koja se u skladu sa propisima mogu koristiti za pokrivanje gubitka. Ukoliko se gubitak ne može pokriti iz sredstava Preduzeća, pokreće se postupak u skladu sa zakonom.

DIO DESETI - OPĆI AKTI PREDUZEĆA

Član 37.
(Akti Preduzeća)

- (1) Opći akti Preduzeća su Statut i drugi akti kojima se na opći način regulišu odnosi u Preduzeću.
- (2) Preduzeće je obavezno da u roku od 60 dana od dana donošenja ove odluke donese Statut Preduzeća usklađen sa odredbama ove odluke.

DIO JEDANAESTI - TRAJANJE I PRESTANAK PREDUZEĆA

Član 38.
(Trajanje i prestanak Preduzeća)

Preduzeće je osnovano na neodređeno vrijeme i traje dok postoje ekonomski i zakonski uvjeti za njegovo postojanje.

Član 39.
(Prestanak Preduzeća)

Preduzeće prestaje:

- a) odlukom Osnivača i
- b) u slučajevima predviđenim zakonom.

DIO DVANAESTI - NAČIN IZMIRENJA TROŠKOVA OSNIVANJA PREDUZEĆA

Član 40.
(Troškovi osnivanja)

- (1) Osnivač snosi sve troškove u vezi sa osnivanjem i početkom rada Preduzeća, koji ne ulaze u osnivački kapital Preduzeća.
- (2) Potrebna sredstva za aktivnost iz stava (1) ove Odluke osigurat će se iz Budžeta Kantona, na poziciji Ministarstva.

Član 41.
(Posljedice neuspjelog osnivanja)

Troškove neuspjelog osnivanja snosi Osnivač.

DIO TRINAESTI - PRIJELAZNE I ZAVRŠNE ODREDBE

Član 42.
(Primjena zakona)

Na pitanja koja nisu regulisana odredbama ove Odluke shodno se primjenjuju odredbe Zakona o javnim preduzećima u Federaciji Bosne i Hercegovine i Zakona o privrednim društvima.

Član 43.

(Imenovanje na kraći period)

- (1) Vlada Kantona će putem Ministarstva u roku od 30 dana od dana stupanja na snagu ove odluke, imenovati na kraći period, a najviše na tri mjeseca, predsjednika i članove Skupštine Preduzeća i u istom roku utvrditi prijedlog kandidata za predsjednika i člana Nadzornog odbora.
- (2) Skupština preduzeća dužna je u roku od 15 dana od dana imenovanja izvršiti imenovanje predsjednika i člana Nadzornog odbora.
- (3) Nadzorni odbor je dužan u roku iz stava (2) ovog člana imenovati direktora preduzeća na kraći period, a najviše na tri mjeseca, uz saglasnost Vlade Kantona.
- (4) Nadzorni odbor je obavezan u roku od 60 dana od dana imenovanja donijeti opće akte za provođenje ove odluke i utvrditi unutrašnju organizaciju i sistematizaciju radnih mjesta.
- (5) Direktor preduzeća imenovan na kraći period je ovlašten za vođenje poslovanja i zastupanje preduzeća i prijavu za upis osnivanja preduzeća u sudski registar poslovnih subjekata.
- (6) Direktor iz stava (5) ovog člana pripada pravo na osnovnu mjesečnu neto plaću utvrđenu posebnim aktom Vlade Kantona.
- (7) Administrativno-tehničke poslove iz ovog člana do osnivanja preduzeća obavlja Ministarstvo.

Član 44.

(Osnov upisa u sudski registar)

Ova Odluka predstavlja osnivački akt na temelju kojeg će se izvršiti upis Preduzeća u sudski registar.

Član 45.

(Ravnopravnost spolova)

Odredbe ove Odluke odnose se podjednako na lica muškog i ženskog spola, bez obzira na rod imenice upotrijebljen u tekstu Odluke.

Član 46.

(Izmjene i dopune Odluke)

Izmjene i dopune ove Odluke vrše se po istoj proceduri kao i donošenje iste.

Član 47.

(Stupanje na snagu)

Ova Odluka stupa na snagu narednog dana od dana objavljivanja u „Službenim novinama Zeničko-dobojskog kantona“.

Broj: _____

Datum: _____

Predsjedavajući Skupštine

Ćazim Huskić